



Dauid ayant Saül en sa puissance, ne luy voulut méfaire, reconnoissant qu'il estoit l'oint du Seigneur.

DAVID fut poursuiuy du Roy Saül iusques en la ville de Ceila, où il le pensa enclorre, mais il eschappa, se retirant és lieux deserts, où Ionathas le vint consoler. Or Saül deceu de son entreprise, alla contre les Philistins qui s'estoient mis aux champs. Adonc Dauid monta au lieu tres-seur d'Engaddi, où de rechef Saül avec trois mille hommes d'élite, le poursuiuit iusques aux rochers & lieux inaccessibles, où les boucs sauuages pouuoient seulement habiter. Or en ce lieu estoit vne cauerne où Saül descendit pour faire les affaires secrettes, en laquelle Dauid estoit caché avec ses gens, qui luy dirent; Voicy le iour auquel le Seigneur a mis entre tes mains ton ennemy, pour en faire ta volonté. Mais Dauid ne luy fit aucun mal, ains luy coupa seulement le bord de son manteau, disant: Ia n'adienne que i'offense l'oint du Seigneur. Or Saül estant hors la fosse, Dauid se mit sur le rocher, & luy monstra le bord de son manteau qu'il auoit coupé, luy disant; Pourquoi escoures-tu ceux qui disent, Dauid cherche ta mort? & toutes-fois tu as esté en la fosse en ma puissance, & ne t'ay voulu toucher. Alors Saül considerant cette fidelité, pleura, se repentant d'auoir à tort tant poursuiuy Dauid, en disant; Vrayement tu est meilleur que moy: tu dois regner sur Israël, Iure moy que tu ne destruiras point ma semence apres moy: & Dauid iura à Saül, & se retira en lieu plus seur.